

Njan aagbaŋ ki PIITA ŋmee ki na

¹ Min Piita u ye Yesu Kristo aakpambal na le ŋmee kigbaŋ kee m tii Uwumbɔr aanib bi ye biwɔwɔm dulnyaa wee ni, ki yaa ki bi Pontus aatiŋ ni, ni Galasia aatiŋ ni, ni Kapadosia aatiŋ ni, ni Asia aatiŋ ni, ni Bitinia aatiŋ ni na. ² Tite Uwumbɔr nan nyan nimi waageehn pu, ki cha Waafuur Nyaan ŋa nimi chain, ni li keei Yesu Kristo aamɔb, aan Uwumbɔr di cha pinn nimi Yesu aasin pu. Uwumbɔr ŋa tinyoor ŋa ni pu, ki tii nimi nsuudoon pam.

Limakl li bi n-yoonn mɔmɔk na

³ Cha ti pak Uwumbɔr u ye Tidindaan Yesu Kristo Aate na; ba pu? u san timi kinimbaak sakpen a, ki gir ma timi lelee, ki di timi ŋa waabim. U nan fikr Yesu Kristo nkun ni. Nima le ti kpa limakl li bi n-yoonn mɔmɔk na. ⁴ Ti mak ke ti ga sil kan tinyoor ti Uwumbɔr di siin paacham kiir timi na. Tinyoor ngbaan aan ŋmaa bii, kaan ŋmaa wɔŋ, kaan doo. ⁵ Naah gaa Yesu ki kii na, nima le Uwumbɔr aapɔɔn biin ni pu, ki ti saa buyoonn ni ga kan waah ga gaa nimi lii mbamɔm pu na, kookoo aataadaal.

⁶ Nima le ni kpa mpopiin. Ni yaa po kpa mpombiin ni yunn siib dandana wee, falaa aabɔŋ ponn ni kan, ni li kpa mpopiin; ⁷ ba pu? falaa ngbaan ga mɔk ke ni gaa Yesu ki kii mbamɔm aan naa gaa. Naah gaa u ki kii pu na jer salmaa u ga bii na. Bi joo salmaa pu mmii ponn ni ke bi lik ke u ŋan aan waa ŋan. Kina le Uwumbɔr cha ni ji falaa ke u lik ke ni gaa u ki kii mbamɔm aan naa gaa. Ni yaa gaa u ki kii mbamɔm kan, le ni ga kan mpakm ni nnyuŋ bundaln

Yesu Kristo ga nyan ubaa mpaan pu na. ⁸ Naa kee kan u, le ni gee u. Ninimbil aa waa u dandana wee, le ni gaa u ki kii. Nima le ni kpa mpopiin sakpen, ki pak Uwumbør, kaa ŋmaa len naah kpa mpopiin ki ti saa pu na. ⁹ Naah gaa Yesu ki kii na, le u gaa nimi lii.

¹⁰ Tɔ, n-yaayoonn na aabɔnabtiib bi nan tuk binib Uwumbør aah ga ter nimi pu na, nan dakl lik mbamɔm, ki ban ke bi bee Uwumbør aah ga ŋa pu ki gaa binib lii na. ¹¹ Le Kristo Aafuur Nyaan mu nan bi bibɔnabr ngbaan ponn ni na mɔk bi ke uma Kristo ga ji falaa, le ki nin kan nnyurɔ falaa ngbaan aapuwɔb. Le bi nan ban bi bee ke ulau ga ji falaa ngbaan, ki ban bi bee buyoonn u ga ji falaa ngbaan na. ¹² Le Uwumbør nan mɔk bi ke baah len tibør ti na, baa len ke bi ter bima bibaa, bi len ke bi ter nimi la. Le ni ŋun tibør ngbaan dandana wee. Uwumbør cha Waafuur Nyaan nyan ni paacham ki tii binib mpɔɔn bi tuk nimi tibɔnyaan tee. Tibɔnyaan timina le Uwumbør aatuuntiib ban ke bi bee taatataa.

Ni li bi chain man

¹³ Nima pu na, ni li dak ilandak i ŋan na, ki li chur nibaa, ki li kpa limakl n-yoonn mɔmɔk; ba pu? Yesu Kristo yaa nyan ubaa mpaan pu kan, u ga ŋa tinyoor ŋa ni pu la.

¹⁴ Ni li keei Uwumbør aamɔb. Buyoonn naa nan kee nyi nsan mu ŋan na, le ni nan dii nisui aah gee pu na. Ni taa ki dii kina. ¹⁵ Cha nimi aabimbin mɔmɔk li bi chain, ke Uwumbør u yin nimi na aabimbin aah bi chain pu na. ¹⁶ Ni ŋmee Uwumbør Aagbarɔ ni ke Uwumbør bui nimi, “Min Uwumbør bi chain la; nima pu na, ni mu li bi chain man.”*

¹⁷ Ni yaa mee Uwumbør kan, ni yin u ke Nite la. Nima pu na, ni li san u buyoonn ni bi na; ba pu? waa pak ubaa ki jer uken. U ga ji binib mɔmɔk aabør baah tun pu na.

¹⁸ Niyajatiib nan bi mbimbin yɔl yɔl ponn ni. Ni nyi ke u

* 1:16 : Lik Liifai Yaab 11.44-45; 19.2.

gaa nimi lii ki nyan nimi mbimbin ngbaan ponn ni. Naa ye tiwan ni ga bii ke ɲimombil na, le u di pan ki gaa nimi lii. ¹⁹ U nan di Kristo aasin mu jer ɲimombil na le gaa nimi lii; uma Yesu nan di ubaa toor kitork ki tii Uwumbər, ki bi ke upihbo nyaan u kaa kpa iween ibaa na. ²⁰ Uwumbər aa nan kee naan dulnyaa le ki nyan Kristo ke u li ye kitork ngbaan. Naah nan ɲeer na, le u dan dulnyaa wee ni, nimi pu. ²¹ U pu, le ni gaa Uwumbər ki kii. U nan fikr u nkun ni ki nyuɲ u. Nima pu le ni gaa Uwumbər ki kii ki kpa limakl.

²² Ni kii Uwumbər aabər ti gbii na la. Nima le cha nimi aabimbin bi chain. Le ni sil gee ninaabitiib. Nima pu na, ni li beenin gee tɔb mbaməm. ²³ Bi ma nimi lelee la. Naa ye unibɔn u ga kpo na le ma nimi lelee. U ma nimi na aan kpo. Uwumbər di waaməboln li kpa liməfal ki ga li bi n-yoonn mu kaa kpa ndoon na le gir ma nimi lelee. ²⁴ Ni ɲmee Uwumbər Aagbaɲ ni ke,
 “Binib məmək bi ke timoor na la.
 Baanyaan bi ke mmopuun na la.

Timoor yɔl mala, le mmopuun mu gbaar,

²⁵ Uwumbər aaməboln ma ga li bi

ki ti saa n-yoonn mu kaa kpa ndoon na.”†

Liməboln ngbaan le ye tibɔnyaan ti bi tuk nimi na.

2

Ni taa ki tun titunwanbir man

¹ Nima pu na, ni taa ki li kpa kinanaɲ, ki taa ki ɲmanni tɔb, ki taa li ye binib bi ɲmanni ke bi ɲan na, ki taa li kpa lipiipoln, ki taa li bii binib. ²⁻³ Nimi nibaa lik ki kan Tidindaan aah kpa tiɲann pu na. Nima pu na, ni li ban Uwumbər aaməbon ke ubopɔɔn aah ban mbiin pu na. Uwumbər aabər gbii, ki ga ter nimi ke ni moo dii waasan mbaməm, ki ɲmar.

† 1:25 : Lik Aisaya 40.6-8.

⁴ Dan Tidindaan u ye limɔfadaan na chee man. U naahn litakpal li bidimaab yii li na la. Le Uwumbɔr lee u ke u ɲan sakpen. ⁵ Ni mu bi ke ɲitakpal ɲi kpa limɔfal na. Uwumbɔr di nimi maa lidichal ke Waafuur Nyaan li bi li ni. U ban ke ni li ye uma ubaa aatotoorb, ki li tun waatuln, Waafuur Nyaan aapɔɔn pu. Yesu Kristo pu, le u ga gaa nimi aatuln ngbaan. ⁶ Uwumbɔr Aagbaɲ len ke,
 “Lik, m lee litakpal li ɲan na ki di bil Sionn aatiɲ ni.
 M di litakpal ngbaan ki di siin kaalɔɔɲ ni,
 le unii umɔk gaa u ki kii na aan ji inimɔɔn.”*

⁷ Nimi bi gaa u ki kii na, u ɲan ni chee sakpen la. Le binib bi kaa gaa u ki kii na, bi li nyi ke Uwumbɔr Aagbaɲ len ke,
 “Litakpal li bidimaab yii li na,
 lima le ye litakpajal,”†

⁸ ki ki len ke,
 “Binib bibaa ga gbeer litakpal ngbaan ki lir.

Litakpal ngbaan pu le bi ga lir.”‡

Baa kii Uwumbɔr aabɔr; nima le cha bi lir, waah siin bi pu na.

⁹ Tɔ, nimi bi gaa Uwumbɔr ki kii na le ye waanileekaam. Ni ye Uwumbɔr u ye Ubɔrkpaan na aatotoorb, ki ye litimbol li bi chain na, ki sil ye Uwumbɔr aanib. U lee nimi ke ni li tuk binib waah ɲan sakpen pu na; ba pu? u nyan nimi mbɔmbɔɔn ni, ki di koon waawiihn mu ɲan sakpen na ni. ¹⁰ N-yoonn mbaa naa nan ye Uwumbɔr aanib. Dandana wee ni ye Uwumbɔr aanib la. N-yoonn mbaa Uwumbɔr aa nan san nimi kinimbaak. Dandana wee u san nimi kinimbaak.

Uwumbɔr aatutum

¹¹ Maanigeekaab, ni ye biwɔwɔm ni bisachum dulnyaa wee ni la. Nima pu na, m gaɲ nimi, ni taa kii nisui aah

* 2:6 : Lik Aisaya 28.16. † 2:7 : Lik Ilahn 118.22. ‡ 2:8 : Lik Aisaya 8.14-15.

gee pu na; ba pu? nisui aah gee pu na kiir nimi Uwumbør aasan ni. ¹² Ni bi binib bi kaa dii Uwumbør aasan na aakaasisik ni la. Ni li tun lituln li ñan na bi chee. Le bi yaa bii nimi ke ni ye bakadam kan, nimi aatunyaan chee bi ga kan ke ni ñan. Nima le ga cha bi nyuñ Uwumbør bundaln u ga ji binib tibør na.

¹³ Tò, ni li keei nimi aaninkpiib mòmøk aamøi Tidindaan pu. Ni li keei nimi aabørkpaan u joo binib mòmøk na aamøb. ¹⁴ Waah kaan bininkpiib ntim ni na, ni li keei bi mu aamøi. Ba pu? u kaan bi ke bi daa binib bi tun lituln li kaa ñan na aatafal, ki ban ke bi pak binib bi tun lituln li ñan na. ¹⁵ Uwumbør ban ke ni tun litulnyaan aan ki cha bijørb bi kaa nyi nibaa ki bii nimi na ñmin la. ¹⁶ Ni bi nibaa pu la. Nima le aa tii nimi nsan ke ni li chuun ñani bakaa. Ni li bi ke Uwumbør aatutum aah ba ga li bi pu na. ¹⁷ Ni li pak binib mòmøk, ki li gee binib bimøk dii Yesu aasan na, ki li san Uwumbør, ki li pak ubørkpaan na.

Yesu Kristo aafalaa aamøkl

¹⁸ Binib bi ye binaagbiib ni ponn ni na, ni li pak nidin-datiib mbamøm, ki li keei baamøi. Bi yaa ye binibamøm, bee bi ti ki ye bakadam kan, ni li pak bi. ¹⁹ Unii u kaa ña nibaa na, bi yaa ña u falaa aan u yaa ji limør Uwumbør pu kan, nima le ñan Uwumbør chee. ²⁰ Bi yaa gbaa nimi, nimi aatunwanbir pu aan ni yaa ji limør kan, nima le aan cha ubaa pak nimi. Ni mu yaa kan falaa nimi aatunyaan pu, ki yaa ji limør kan, nima le ga piir Uwumbør aasui. ²¹ Ba pu? Uwumbør yin nimi bi dii u na ke ni li ji falaa; ba pu? Kristo mu nan jin falaa ni pu. Nima le ye limøkl ki tii nimi, ke ni li dii waataabuu. ²² Waa nan ña titunwanbir aatuln libaa, ki mu aa nan møn nnyamøn mubaa. § ²³ Baah seei u na, waa giin sii bi. Waah jin falaa na, waa len ke u ga teen bi. U

§ 2:22 : Lik Aisaya 53.9.

di ubaa ŋa Uwumbør u ji tibør mòmøk mbamòm na aarjaal ni la. ²⁴ U nan kpo ndəpuinkoo pu timi aatunwanbir pu, ki sil timi aasisiiaan ki gaa timi aatafadaan. Nima pu na, ni di titunwanbir mòmøk lii, ki li dii mbimbin mu ŋan na. Waah gaa tigbar ti na pu, le Uwumbør tii nimi laafee. ²⁵ Ni nan bi ke ipiih i yenn na, le dandana wee, ni gir ni Kristo chee. U kpa a nimi ke upihkpaal aah kpa ipiih pu na, ki kii nimi aaməfal.

3

Puutiib ni chatiib aabør

¹ Bipiib, ni li keei nichatiib aaməi. Ni yaa keei baaməi, aan chatiib yaa bi, kaa kii Uwumbør aabør kan, nibaakan bi ga gaa u ki kii nimi aabimbinyaan pu. Hali ni yaa kaa len tibaa kan, ² bi ga kan ke ni san Uwumbør ki kpa mbimbin mu bi chain na. ³ Bipiib, tiwan ni ga cha ni li ŋan na aa ye tiyikpir ti buu na, kaa ye nleen mu kpa kidaak na, kaa ye tiwanpeenkaan nyaan. ⁴ Tiwan ni ga cha ni li ŋan na le ye mbimbin mu ŋan na. Ni yaa kpa mbimbin suuna kan, nima le ye kinyaan ki kaan fir, ki ŋan sakpen Uwumbør chee na. ⁵ N-yaayoonn na aapiib bi nan bi chain ki kpa limakl Uwumbør pu na, nan keei bichatiib aaməi, nima le nan cha bi kpa kinyaan ki nan ŋan binib chee. ⁶ Sara nan ŋani kina la. U nan keei uchal Abraham aaməb, ki yin u ke udindaan. Ni yaa tun lituln li ŋan na, ki yaa kaa san ijawaan ibaa Uwumbør aasan ni kan, ni kpaln Sara aabisatiib la.

⁷ Bijab, ni mu li nyi naah joo nipuutiib pu na. Bipiib aa kpa mpəon ke bijab aah kpa pu na, nima na, ni li pak bi; ba pu? nimi ni bima le ga kpaan kan Uwumbør aapiin i ye liməfal li kaa kpa ndoon na. Ni li joo bi mbamòm, nimi aameel taa ŋa yəli.

Ji mbimbinyaan aafalaa

⁸ Kookoo aabər le ye ke ni məmək li kpaan kiməbaan, ki cha nitafal li bi təb ni, ki li gee təb ke naabitiib na, ki li san təb kinimbaak, ki sunn nibaa taab. ⁹ Binib yaa ɲa nimi bakaa kan, ni taa teen bi. Bi yaa sii nimi kan, ni taa sii bi ki teen. Ni bui bi ke, “Uwumbər ɲa tinyoor ɲa ni pu;” ba pu? Uwumbər yin nimi ke u ɲa tinyoor ɲa ni pu la. ¹⁰ Ni ɲmee Uwumbər Aagbar ni ke,

“Unii yaa ban ke u li kpa mpopiin, ni mbimbin mu mə na kan,

u taa ki len tibəbir, ki taa ki mənɪ inyamən,

¹¹ ki taa ki tun lituln li kaa ɲan na;

u tun lituln li ɲan na,

ki li ban nsuudoon linimaln;

¹² ba pu? Tidindaan Uwumbər aatafal bi bininyaam ni,

ki ɲun baameel n-yoonn məmək,

le ki yiil binib bi tun titunwanbir na.”*

¹³ Tə, ninimbil yaa man lituln li ɲan na pu kan, ubaa ga ɲa nimi bakaa aa? ¹⁴ Ni mu yaa kan falaa lituln li ɲan na pu kan, Uwumbər aanyoor bi ni pu la. Ni taa san unii ubaa ijawaan, ki taa cha ilandak li joo nimi.† ¹⁵ Ni li pak Kristo nisui ni, ki di u ɲa Nidindaan. Ni li gor n-yoonn məmək, unii yaa nan baa nimi kan, ni ga ɲmaa tuk u naah kpa limakl pu na. Ni tuk u suuna, ki pak Uwumbər. ¹⁶ Ni li ɲani ni ɲan na n-yoonn məmək, le naah dii Kristo mbaməm ki kpa mbimbin mu ɲan na na, nima le ga cha iniməən chuu binib bi sii nimi ki len nimi tibəbir na. ¹⁷ Ni yaa ye Uwumbər aageehn ke aa ji falaa litunyaan pu kan, ni soor ni aa ji falaa titunwanbir pu. ¹⁸ Ba pu? Kristo ubaa nan kpo nfum mbaa timi aatunwanbir pu. Kristo u ye uninyaan na nan kpo timi bi ye tiniwanbir na pu, ke u di ti ni Uwumbər kpaan. Bi nan ku waawon, le Uwumbər Aafuur Nyaan

* 3:12 : Lik Ilahn 34.12-16. † 3:14 : Lik Aisaya 8.12.

tii u limɔfal, ¹⁹ le u nan buen ki ti len tibɔnyaan binib aawiin i bi kiyondiik ni, kitekpiitij ni na chee. ²⁰ Bi nan bi Nowa aayoonn, kaa nan kii Uwumbɔr aamɔb, le u nan jin limɔr bi pu, ki kii n-yoonn mu Nowa nan ti kpɔi buɔɔb doo na. Binib biniin baanja le nan koo buɔɔb ngbaan ni, le ki ɲmar nnyun pu. ²¹ Nnyun ngbaan le ye baah muini binib nnyun ni na aamɔkl. Dandana wee, bi yaa muin nimi nnyun ni kan, ni ɲmar a; ba pu? Yesu Kristo nan fikr nkun ni. Nima le cha ni ɲmar. Bi yaa muin nimi nnyun ni kan, naa ye ke bi fu nimi aawon nnyun tiwon aajɔɔ pu la. Ni ye ke ni di titunwanbir di lii, ki puu tipuur ke ni ga dii Uwumbɔr. ²² Yesu Kristo nan buen paacham ki ti bi Uwumbɔr aarɔngii wɔb. Le Uwumbɔr di waatuuntiib, ni paacham yaab, ni kinimbɔɔ ni kaarɔɔn mɔmɔk ɲa Yesu Kristo aarɔal ni.

4

¹Tɔ, Kristo aah nan joo unibɔn aawon na, u nan jin falaa. Nima pu na, ni mu kii ke ni ga ji falaa man, ke waah nan kii pu na. Waah nan jin falaa tiwon ponn ni pu na le u nan kuln titunwanbir. ² Nima pu na, naah laa bi dulnyaa wee ni na, ni taa ki kii nisui aah gee pu na, ni li keei Uwumbɔr aah gee pu na. ³ Ni nan tun titunwanbir n-yoonn mu jer na; ni ɲeer kina. Ni nan ɲani ke binib bi kaa nyi Uwumbɔr na aah ɲani pu na, ki dii bipiib, ki dii tiwan ni kaa ɲan na aakpeek, ki nan kuuni tɔb ki nyun ndaan gbii, ki tun lituln li kaa ɲan na, ki dii ɲiwaa ɲi sukr ponn ni na. ⁴ Naah kaa ki kpaani titunwanbirdam ngbaan chee ki ɲani kina na, ni gar bi la, le bi seei nimi. ⁵ Bi ga sil Uwumbɔr aanimbiin ni ki len baah tun pu na. U gor ke u ji binib bi fu na, ni binib bi kpo na tibɔr. ⁶ Nima le cha bi nan tuk binib bi kpo na Uwumbɔr aabɔnyaan tee. Bi nan kpo ke unibɔn mɔk aah kpo pu na. Le bi nan tuk bi Uwumbɔr aabɔnyaan tee, ke bi

kan nsaan ki gaa u ki kii aan baawiin kan Uwumbør aaməfal ki li bi u chee.

Ni li ye Uwumbør aatutunyaam

⁷ Tə, ni gur siib le tiwan məmək ga doo. Nima pu na, ni li kpa laasaab, ki chur nibaa, ki mee Uwumbør. ⁸ Tiwan ni jer tiwan məmək na le ye ke ni li gee təb mbaməm; ba pu? aa yaa gee unii kan, aa ga di cha pinn u titunwanbir pam. ⁹ Ni li channi təb tichann ki taa ŋulni. ¹⁰ Uwumbør tii ni məmək Waafuur Nyaan aapiin la. Waah tii nimi ipiin aabəŋ aabəŋ na, ni di ipiin ngbaan ter biken. ¹¹ Uwumbør yaa tii unii ipiin ke u len Uwumbør aabər kan, u teer ke ni ye Uwumbør aabər le u len. Uwumbør yaa tii unii ipiin ke u ter biken kan, u li ter bi Uwumbør aah tii u mpəən pu na. Ni li nyuŋni Uwumbør tiwan məmək ni, Yesu Kristo pu. Uma le yeh mpakm ni mpəən n-yoonn mu kaa kpa ndoon na. Amii.

Yesu Kristo aadidiliib aah ji falaa pu na

¹² Njətiib bi m gee bi na, ni ji falaa u wu sakpen na la. Ni taa dak ke ni ye tiwachann la. Uwumbør cha ni ji falaa ke u lik nimi aabimbin aah bi pu na la. Ni taa cha ni gar nimi. ¹³ Ni li kpa mpopiin; ba pu? ni yaa ji falaa u Kristo nan jin na kan, ni ga li kpa mpopiin sakpen bundaln u ga gir ni ki nan mək waah nyuun pu na. ¹⁴ Bi yaa sii nimi Kristo aayimbil pu kan, Uwumbør aanyoor bi ni pu la; ba pu? Uwumbør Aafuur Nyaan mu ŋan sakpen na bi ni ni. [Bima le seei Kristo, le nima pak u.] ¹⁵ Le ni ponn ni ubaa yaa jin falaa linikul pu, bee kinaayuk pu, bee baka baka pu, bee libəbaln pu kan, nima aa ŋan. ¹⁶ Tə, unii yaa jin falaa Yesu Kristo aasan pu kan, u taa cha iniməən li joo u. U li pak Uwumbør waah ye Yesu Kristo yoo na pu.

¹⁷ Ni ŋeer Uwumbør piin ki ji binib tibər. U ga puen ji waanib le tibər, le ki nin ji biken tibər. U yaa puen ji timi

waanib tibər kan, binib bi kaa kii waabɔnyaan na aabər ga doo kinye? ¹⁸ Ni ɣmee Uwumbər Aagbarj ni ke, “Ni yaa pɔɔ bininyaam ɣmar kan, titunwanbirdam bi kaa pak Uwumbər na ga tee ɣa kinye ki ɣmar?”*

¹⁹ Nima pu na, unii yaa ji falaa Uwumbər aageehn pu kan, u li tun lituln li ɣan na, ki di ubaa ɣa Uwumbər u nan naan u ki ye mbamɔndaan na aarjaal ni.

5

Uwumbər aanib aabimbin

¹ Tɔ, m ye Yesu aanib aaninkpel, ki nan kan Kristo aah jin falaa pu na, ki tuk binib kina. M mu ga ji waamɔɔn mu ga nya mpaan pu na. Nima pu na, m garj nimi bi ye Yesu aanib aaninkpiib na, ² ni li ter Uwumbər aanib bi bi nido na, ke upihkpaal aah lik waapiih pu na. Ni taa ter bi limukl aaterm. Ni li ter bi nimi aageehn, Uwumbər aah ban pu na. Ni taa ter bi ɣimombil pu, ni li ter bi ni mpopiin. ³ Uwumbər di bi ɣa niɣaal ni la. Ni taa ɣani ke naah ye bidindatiib le na. Cha nimi aabimbinyaan mək bi baah ga dii pu na. ⁴ Ni yaa ɣani kina kan, buyoonn upihkpaaninkpel ga gir ni na, ni ga kan lipal li mɔ sakpen ki ga li bi n-yoonn mu kaa kpa ndoon na.

⁵ Nimi bi kaa por na, ni li keei binib bi kpeln nimi na aamɔb. Ni mɔmɔk li sunni nibaa taab, ki li ter tɔb. Ba pu? Uwumbər Aagbarj len ke, “Uwumbər yiil kalmbaanidam, le ki lik faar binib bi sunni bibaa taab na.”* ⁶ Nima pu na, ni li sunni nibaa taab, Uwumbər u yeh mɔɔɔn mɔmɔk na aarjaal ni. Le ni yaa nan ɣeer kan, u ga nyuɣ nimi. ⁷ Limukl limək muk nimi na kan, ni di li mɔmɔk ɣa Uwumbər aarjaal ni; ba pu? utafal bi ni ni.

* 4:18 : Lik ɣiyataɣak 11.31. * 5:5 : Lik ɣiyataɣak 3.34.

⁸ Ni li kpa laasaab ki li nyi; ba pu? kinimbərɔŋ ki ye nimi aadin na chuun gonni, ki ban ke ni di Uwumbər aasan lii. Ki bi ke uchinn u chuun tar, ki ban unii u ki ga chuu ki ŋmɔ na la. ⁹ Ni yii u man. Ni gaa Uwumbər ki kii mbaməm man, ki taa di cha. Ni nyi ke ninaabitiib bi bi dulnyaa wee ni na mu bi ji falaa ke naah ji pu na la. ¹⁰ Ni yaa ji falaa ni yunn siib kan, Uwumbər ga ter nimi, ki tii nimi mpɔɔn ni li dii u mbaməm, ki taa gir puwɔb. Ba pu? nterm məmɔk nyan ni uma le chee. U nan yin nimi Kristo pu, ke ni nan ji waamɔɔn n-yoonn mu kaa kpa ndoon na. ¹¹ Uma le yeh mpɔɔn məmɔk n-yoonn mu kaa kpa ndoon na. Amii.

Kookoo aadoon

¹² Tɔ, m nyi ke Silfanus, u ye tina aabo na, bi mbaməm la. Uma le ter mi le m ŋmee kigbarɔ waatiir kimina tii nimi ki pɔɔk nitaakpab, ki tuk nimi mbamən ke maah ŋmee pu na le ye Uwumbər aabər, ki ye mbamən. Ni taa di ti lii.

¹³ Yesu aanib bi bi Babilon aatiŋ ni na dooni nimi. Bi ye binib bi Uwumbər nyan bi na. Maabo Mak mu dooni nimi.

¹⁴ Ni li dooni tɔb ke binib bi gee tɔb na.

Uwumbər tii nimi bimɔk ye Kristo yaab na nsuudoon.

Uwumbør aagbar
Bible without Deuterocanon in Konkomba

copyright © 2014 Wycliffe Bible Translators, Inc.

Language: Konkomba

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2014, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Konkomba

© 2014, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

